

欽定剿平三省邪匪方略

欽定剿平三省邪匪方略正編卷九

丙辰年

五月初一日

乙巳

孫士毅奏言查來鳳賊匪現在

自石梁子以東之堰塘茶園溪洗車苗寨溝興

隆切一帶到處屯聚爲數甚多

臣

派人偵知該

匪等一緣小切賊巢已破無處棲身一緣欲伺

官兵防範稍疎卽奪路從卯崗南河順流而下

由酉陽大溪口直達永順府保靖縣希圖竄跡

楚南現在溪水漲發舟行甚駛臣已專派弁員

在大溪口水路設營防守並令卯崗巡檢沈懷

楓將該處船隻悉行拘集對岸塘坳絕其竄逸

之路惟現值山雨連朝坡險嶺滑士卒行走稍

艱一俟天氣漸開臣卽鼓勵弁兵督領剿除查

該匪向以小坳爲巢穴以旗鼓寨茶園溪爲東

西犄角互相救應今小坳已破而茶園溪旗鼓

寨兩處尙各有賊萬餘若得將茶園溪一帶賊
匪盡數殲戮則旗鼓寨賊勢已孤不難立時撲
滅肅清來鳳再聞賊匪以復擾至湖北咸豐縣
地方甚爲猖獗查咸豐接壤川省黔江前此卽
有匪徒欲來阻截川省運道之語臣截留官兵
三百名在彼防守今咸豐賊匪萬一擾至黔江
恐不足以資堵禦當卽抽兵二百名令守備斬

文銓帶領由山僻小路前赴黔咸交界地方駐
劄酌量進剿

同日成德惠齡富志那奏言_臣等自攻克蔡家

坡賊卡之後察看賊匪山前形勢陡仄異常斷
難進兵其餘沿山一帶凡有可以攀援前進之
處賊匪皆已挖斷並紮有木石各卡周圍布滿

_臣等悉心訪查日前官兵所奪楊白堰一處在

賊巢東南茅坪一處在賊巢東北偏崖一處在賊巢之西石板坳一處在賊巢之南賊匪現在對面高山添人築卡把守若由偏崖轉入天井湖由楊白堰石板坳轉入青龍溪由茅坪轉入鄧家畝路雖少紆然從彼路再過兩山兩溝卽有可通灌灣山頂之路賊見官兵盡在山前駐劄是以此三處雖經設卡賊尙無多亟須出其

不意奪此三卡使賊人腹背受敵即可乘隙直搗賊巢二十日積雨初晴因於樹林山坳多設疑兵作爲分路進剿之勢又派委將領等官聲東擊西連日在山前各卡攻撲賊匪聚其黨類在山前盡力抵禦臣等密抽兵六百名分爲三路親身帶領另覓旁徑卽于二十二日夜間分撲天井湖青龍溪鄧家畝三路賊卡逆匪果無

多人官兵將所築卡牆推倒踴躍而入殺賊數
十人將賊卡悉行奪獲餘匪逃上前面山梁我
兵乘勝追逐賊人翻山奔竄該處樹林叢翳陡
滑異常臣等步行攀援而上遙見賊巢山後築
有土牆二道牆內宅有深溝臣等卽于天井湖
青龍溪鄧家畝三處紮營仍飭山前各將奮力
攻擊俟設法將土牆轟塌卽可一鼓而入再查

文圖先經奉

旨令其帶兵往剿來鳳之賊嗣因榔坪賊勢猖獗復
奉

旨令先赴該處剿捕該鎮現在尙無來信恐稍稍稽時
日查山西兵二千名駐劄邊界爲河南策應該
處已有山東直隸兵丁兼以恒瑞等所帶滿漢
官兵節將鄖陽各處賊匪搜剿卽日均可會合

是河南襄陽一帶兵力似已敷餘可否將山西
兵二千名催令來楚爲協濟來鳳之用更可期
迅速歲事又查施南府恩施縣屬之花背橋等
處間有匪徒聚衆之事當經該府拏獲逆夥楊
添受等四名一面督同知縣尹英圖經歷蔣遇
春並把總杜連順外委龔洪基袁存禮帶領兵
勇分路往捕尹英圖於途次猝遇賊首朱得洪

率領數十人前來探信經兵勇等一齊圍捕將
朱得洪拏獲並獲匪夥二十人餘賊盡皆殺斃
賊匪聞官兵驟至卽率衆迎出抵死抗拒相持
一日夜該府縣激勵官兵鄉勇奮力爭先登時
殺死賊匪三百餘人生擒賊首陳谷珍朱得名
徐開緒楊光富賊目徐開榮陳如相胡光瑞趙
元明並賊夥王秀等共一百二十二人婦女七

十六人餘匪四散竄逃跳巖跌斃自縊投塘身
死者不計其數奪獲火鎗刀矛器械大小布旗
甚多進至賊巢搜獲大木礮四個並糧食牛馬
猪羊等物無數當卽分散鄉勇人等一面將各
犯房屋全行燒燬訊明各犯等均係習教謀逆
欲來宜都一帶入夥等情隨分別凌遲斬決梟
示

同日慶成景安富成奏言

臣

慶成馳抵新野帶

領直省官兵於楚省交界之利河口紮營

臣富

成帶山東兵在新店舖南駐劄

臣

景安將糧馬

軍需諸務趕緊備辦連日選派奮勇弁兵直赴

楚境查探賊情捉獲活賊胡士孝等五名訊得

賊匪聞知大兵由豫進剿不敢在鄧新一帶滋

擾現在呂堰驛以南王家樓劉家集雙溝三處

屯聚附近村莊三合鎮等處亦有逆賊潛匿雙溝三面環河東面倚山其勢稍險逆賊輜重家口在內王家樓爲呂堰驛一路之賊佔踞劉家集地勢平坦係呂堰雙溝兩賊巢接應之處近聞襄城附近賊勢稍減樊城賊衆大半前來雙溝附合爲抗拒官兵之計查南陽所屬近楚邊界皆爲邪教傳染之區若大兵直搗雙溝而西

北一帶村莊皆有賊匪往來出沒恐奸計乘虛抄襲尤須密爲防範臣等現在嚴催晉兵前來擬卽分布豫楚交界各要路堵禦豫省沿邊地方得以鎮靜卽可專心前進搗穴擒渠亦無顧此失彼之慮均奏入

上命軍機大臣傳諭孫士毅恒瑞惠齡景安曰此次惠齡等帶領官兵分投直撲天井湖等處雖未能

將賊匪痛殲而三路賊卡俱已攻克所辦尙好至
所請山西兵二千催令赴楚一節此項兵丁已據
景安奏分撥防剿惠齡處兵力不敷莫若令恒瑞
文圖帶兵先助惠齡將灌灣腦之賊悉力攻圍擒
拏賊首爲是至施南府屬之恩施縣有賊屯聚經
知縣尹英圖等率領鄉勇分路擒捕殲斃多賊洗
蕩賊巢知縣尹英圖著卽以同知陞補其經歷將

遇春及把總外委等俱著酌量陞用以示獎勵至
豫省近楚邊界多有教匪景安當駐劄南陽新野
一帶督率彈壓不必深入楚境慶成富成會合永
保鄂輝卽速將襄樊一帶賊匪剿淨再來鳳賊匪
在茶園溪一帶屯聚爲數甚多孫士毅現兵無多
不可存欲速之見輕於深入若能將茶園溪一帶
賊匪先行剿除固屬甚善但須悉心籌酌如兵力

不敷不妨畧爲停待俟恒瑞文圖等帶兵前抵來
鳳彼此會合夾攻可也

上諭內閣曰惠齡奏此次打仗文武各員不避艱險
踴躍爭先將緊要賊卡連奪三座尙爲奮勉總兵
富志那著賞給法福里巴圖魯名號侍衛關騰賞
給奇徹伯巴圖魯名號仍各賞銀一百兩副前鋒
叅領塔思哈護前鋒校倭什渾著交本營遇有應

陞缺出補用副將張持道員先福叅將程鵬翼守
備林朝輔俱著加恩賞戴花翎候補守備鄧興相
候補知縣楊畧候補縣丞蔣振萬俱著加恩賞戴
藍翎

初二日

丙午

永保鄂輝奏言

臣

於二十三日馳抵

襄陽察看賊勢邪匪原不甚多而被擄脅從者
居其大半每遇打仗將年力強壯之人推擁擄

鋒不顧利害直前進撲以此深爲得計其實毫無紀律目下良莠難分人數甚多其搶掠佔踞之處自樊城以至豫省交界蔓延一百餘里若以現來之兵無論多寡隨到隨剿其勢祇可攻打一處不能牽制賊勢賊人各處必來應援勢不能卽時得手今蒙

賞發直隸山東山西兵五千餘名將次行抵南陽將

軍恒瑞剿辦保康餘賊約數日內亦可完竣卽
可帶兵前來襄陽是南北兩路俱有多兵約齊
夾擊不難殲盡根株

臣

等已密遣明白幹弁潛

往探詢現值麥秋成熟之際賊匪正在割刈積
貯數日間其勢不肯轉徙現在河南接壤有景

安慶成富成在彼駐劄南面漢江阻隔又有兵

民堵截

臣

等愚昧之見此時且不必以先到之

兵零星輕試俟與慶成景安富成等商酌兵力
齊集後如何分兵進攻令巴圖魯侍衛等預先
探明路徑一俟南北兩路官兵到齊約定日期
同時並進可期勢如破竹一舉蕨事再查泥河
口等處賊匪現已剿盡該處尚有應赴保康一
帶之副將百祥帶兵五百名駐劄聽調今保康
餘賊業據恒瑞剿洗完竣此時可令百祥帶兵

卽由鄖陽直抵襄陽順流而下不過三四日可
到不必又繞赴保康徒增往返奏入

上命軍機大臣傳諭恒瑞永保景安慶成曰永保等
所奏不必以先到之兵零星輕試一俟兵力齊集
商同並進所見甚是邪教匪徒藉端煽惑四路迫
脅蟻聚日多若零星打仗設官兵稍有損挫不免
氣餒賊勢轉張今永保明亮已抵襄陽並知會恒

瑞卽帶所有之兵前赴襄陽而慶成富成德齡等
帶領直隸山東山西兵亦由豫境前進至文圖昨
令前赴惠齡處協同剿賊今仍著恒瑞等酌量情
形如惠齡處可無須文圖急於前往卽令該署鎮
帶兵先赴襄陽會合攻剿恒瑞承保於官兵齊集
後務須先將賊匪奔竄之路預行堵截其漢江沿
岸一帶尤須嚴密防範將船隻先行提集不使賊

匪得以偷渡南竄景安在豫境更當實力堵剿俾
其無路可逃再行約期並進四面兜擒不可專攻
一處致賊乘間奔竄總之襄陽迤北一帶賊匪剿
淨則聲勢聯絡自北而南當陽宜都一帶自必勢
如破竹又聞賊匪狡獪往往將被擄脅從之人迫
令在前攫鋒此等愚民被賊擄掠既爲之驅使服
役妻女並被姦淫及至抗拒官兵又復爲之衝鋒

就死實屬可憫恒瑞等可先爲曉諭以爾等本係
良民與其爲賊虐使又復驅令當先致被官兵殲
戮曷若幫助官兵反戈相向攻殺賊匪不但可以
免罪且可以邀功報仇如此明白宣諭卽不能盡
行聽從亦可解散賊黨於剿捕機宜較爲事半功
倍

初四日

戊申

宜綿奏言

臣接奉

諭旨令查訪竹山知縣守備等是否被害一事茲抵
鄖陽經該縣稟解兵役李登甲等五人前來隨
卽委員詳訊據供竹山縣於本年二月十九日
卽聞有賊匪來搶縣治之信該縣本無城池所
設額兵除調赴湖南枝宜並防汛外存城止有
六十餘名該縣劉大成同守備署遊擊事孫掄
魁典史吳國華於每門設立木柵打造刀矛分

給居民至二十二日寅時賊匪潛來放火百姓
驚慌奔走劉大成等急率兵役追趕堵禦賊勢
衆多約有數千人蜂擁前來砍開木柵一擁而
入劉大成等奔回署中各帶印信同出東柵門
回望火光四起商議赴府請兵以圖收復行至
武陽堡見行人紛紛傳說前途亦有賊匪截路
聞鄖陽城門已閉三人相對痛哭共說地方失

陷不能固守現在無處請兵收復只有一死等語隨行之兵丁李登甲等用言勸慰並令兵役等分赴前途探聽及兵役回至該處見劉大成等已經在路旁樹上自縊身死解救不及隨將

該縣等印信關防鈐記各一顆赴府呈繳

臣恐

一面之詞未可深信密訪衆口如一查該縣知縣等失陷地方死非其所較之殉節者固屬有

間但無城可守捐軀屬實尙非逃避偷生者可
比業已失陷地方應請無庸置議

同日孫士毅奏言

臣

於十四日午刻將卯崗安

福苗容各營官兵盡數分撥俱於戌刻起身分
作四路一從石梁子撲剿堰塘興隆坳一從卯
崗撲剿下洗車苗寨溝一從小坳獅子坪撲剿
石將軍攔馬山銅盆井一從小坳乾溝撲剿上

洗車唐家嘴茶園溪十五日黎明兩勢未止官
兵齊用短刃分路殺入聲震山谷各處賊匪忙
亂抵禦經我兵痛加殲洗賊人俱竄至茶園溪
該處賊匪既多又復兇悍見官兵一到率衆抗
拒正在格鬪間千總張超手持長矛首先搶入
將騎馬白衣賊首殺死我兵見之勇氣百倍賊
人知難抵敵一路敗逃我兵追殺四十餘里賊

屍徧野餘從頭道水老寨渡河而遁未渡之賊
俱被我兵斫殺跌入湍流查小坳茶園溪旗鼓
寨三處賊匪最多今小坳茶園溪俱已攻破並
連日將三脚巖下魚塘班車有賊處所逐一搜
剿南北西三處賊匪均已掃除此外餘匪俱經
偏入紅巖堡旗鼓寨一角正可聚族殲旃查諸
神保駐劄龍山城外距旗鼓寨十五里臣已知

會該鎮訂期兩面夾攻此次分路痛剿因備弁
畧少叅將何元卿等傷未全愈亦俱身在行間
湖北副將樊繼祖亦帶兵攻剿一路縣丞張桐
侯陞巡檢沈懷楓俱帶領鄉勇分投殺賊實係
人人用命陣亡受傷兵勇現在照例咨部再來
鳳地方文員只有巡檢沈懷楓一人距施南府
數百里亦因到處賊據勢難照料該巡檢以貧

竊微員招集鄉勇保護地方籌辦口糧接濟兵
勇實屬出力至前次經臣奏請於情願出師之

土兵內調集數百名前來協剿今諸神保慶溥
前至來鳳三面夾攻聲勢已大可以不用土兵

臣已飛札停止

同日玉德奏言荊湖廣督臣畢沅咨會現在楚

省大兵雲集需馬較多已奏請撥東省營馬解

赴荊州軍營以濟急需臣卽於臣標左右兩營

內挑馬一百五十匹並前次出征兵丁留存本
身例馬內挑選二百匹派委安幹備弁押解荊
州交與畢沅接收撥用均奏入

上命軍機大臣傳諭孫士毅畢沅宜綿曰此次孫士
毅督率官兵剿淨茶園溪一帶賊匪甚屬可嘉著
賞給大小荷包以示獎勵千總張超首先殺賊實

爲奮勇著卽以守備陞用縣丞張桐亦卽以知縣
陞用巡檢沈懷楓履覓鄉勇守禦要路復分投殺
賊亦屬可嘉前已有旨以應陞處陞用著孫士毅
查明該員如果始終奮勉卽再加一等陞擢至玉
德奏准咨撥解營馬赴楚山東距襄陽二千餘里
荊州更遠若待東省馬到不特耽延時日且暑日
長途解送馬力已疲到彼亦不適用而綠營兵丁

騎射又非其所長更恐不能得力徒滋糜費此由
畢沅未能通盤籌畫率行咨調著畢沅與永保景
安等悉心商酌如可無需卽行飛札停止令於途
次轉回倘尙有必需追捕之處亦不妨聽其解往
劉大成等雖未罵賊捐軀但該縣向無城垣賊匪
猝至該員等旣係自縊究與偷生者有間著交部

查明照例辦理

初六日庚戌慶成景安富成奏言本月二十六日

有賊匪三路突出撲近署遊擊揆明營盤揆明

督兵鎗礮齊發臣富成率領叅將丁有成守備

郭承緒等督放大礮打傷逆賊數百生擒八名

臣慶成自利河口帶領巴圖魯侍衛並奮勇馬

兵前往截殺賊匪隨即退竄天晚收兵二十八

日探得雙溝劉家集等處逆賊數千自南向北

焚燒村莊肆行搶掠僅距

臣

慶成營盤十餘里

隨派遊擊穆克登布帶兵攜礮於翟家灣埋伏

並派副將王文雄等帶兵前往白河對岸引誘

賊衆將次渡河埋伏鎗礮齊發穆克登布帶兵

首先奮勇過河追殺王文雄等前後接應

臣慶

成督同巴圖魯侍衛等並挑奮勇馬兵一百名

繞擊衝殺賊衆潰敗官兵追殺二十餘里殲賊

數百名內有大小賊目五名奪獲白旗鎗矛撲
刀數十件並擒獲活賊二十餘人審明梟示是
日臣富成營盤西南亦有賊衆數千於村內放
火當卽督兵鎗礮並施打傷賊匪甚多餘卽逃
竄所有奮勇打仗巴圖魯侍衛出力弁兵各分
別獎勵存記再太原鎮德齡已於四月二十八
日趕到新野山西兵日內亦可到來

同日景安又奏言查南陽府屬浙川縣有郭鳳
彩舉首邪教褚鳳廷曹相坤等當經知府完顏
岱同知沈清直前往將褚鳳廷曹相坤拿獲並
究獲同教之關老肖等訊據曹相坤供認在陝
西白河縣拜從陳孝爲師學習邪教回至浙川
縣傳播惑衆並關老肖褚鳳廷等俱各供認傳
誦悖逆咒語輾轉傳徒各情節臣於審明後當

將該犯等卽行正法密咨陝西撫臣查拿陳孝
辦理

同日恒瑞奏言查保康賊匪竄據山頂地名喇
吧洞四面壁立甚爲險峻連日上攻賊匪恃險

死守探得賊中口糧無多業經我兵周密環圍
斷難遁匿臣卽酌分官兵交文圖帶領將喇吧

洞賊匪圍攻相機剿洗臣帶兵於二十八日起

赴襄陽會商剿辦

恒瑞永保又奏言臣等由陝赴楚剿洗逆匪所

有糧餉軍火因竹谿竹山梗塞均由陝西興安
運送供支今將竹谿竹山房縣保康等處賊匪
掃除殆盡道路已通茲據鄖陽府知府王正常
會同陝省委員等酌擬陝省應付糧餉軍火至
保康竣事起程之日爲止其自保康以南均歸

楚省接辦陝省尙有運到未用者卽交知府王
正常接運報銷均奏入

上命軍機大臣傳諭恒瑞景安宜綿曰景安等奏剿
殺賊匪情形所辦俱好恒瑞現赴襄陽協剿自可
多得一人之益恒瑞永保景安慶成富成俱著賞
給大小荷包其隨同打仗出力之巴圖魯侍衛及
副將遊擊等均賞給大小荷包以示獎勵至舉首

邪教之郭鳳彩著景安酌賞頂戴陳孝係傳教要
犯著宜綿秦承恩飭屬嚴密查拿務獲但不可稍
涉張皇驚擾良民爲要

上諭內閣曰豫省南陽地方前因間被楚匪滋擾所
有該府所屬之鄧州新野兩處本年應徵錢糧已
令該撫出示曉諭概行緩徵今念南陽所屬州縣
及彰德懷慶衛輝開封汝寧許州等府州屬或與

楚境接壤各集義勇嚴行防禦或馳遞文報運送
餉銀夫馬絡繹該處士民均屬踴躍出力所有南
陽府屬之唐縣淅川桐柏內鄉南陽鎮平泌陽裕
州葉縣南召舞陽懷慶府屬之河內武陟彰德府
屬之安陽湯陰衛輝府屬之淇縣汲縣新鄉獲嘉
考城開封府屬之蒙津鄭州新鄭蘭陽祥符尉氏
洧川許州並許州所屬之長葛襄城臨潁鄆城汝

寧府屬之西平遂平確山信陽等三十六州縣所
有本年應徵新舊錢糧概行緩至秋成後開徵以
示體恤而紓民力

初七日

辛亥

原任湖廣總督調任兩江總督福寧

奏言

臣

從永順馳抵龍山與來鳳縣僅一河之

隔四月二十四日亥刻據巡哨千總馬廷相拏
獲奸細二人訊據供認係白蓮教匪並稱有賊

人千餘名在來鳳縣治地方屯聚遣該犯等出
探官兵信息臣思欲攻旗鼓寨之賊必不可使
賊人於來鳳佔住致有抄襲之虞急應乘其不
備速行撲滅隨將該二犯正法梟示一面率領
諸神保慶溥分兵兩路渡河前進賊人猝不及
防我兵奮勇向前賊人始猶抵拒因見官兵勇
猛力不能支卽紛紛潰逃諸神保慶溥等隨後

追殺擊斃不計其數餘賊均向旗鼓寨一路奔竄查來鳳縣衙署已經殘燬百姓房屋大半焚燒察看地勢兩面皆山形如釜底又無城垣可守此時官兵斷不可仍在該處駐劄因周圍相度附近縣治東首近鳳山山梁可以拏卡二座西北望城山山梁可以拏卡一座此二處一經拏定來鳳迤北一帶民人即可復歸舊業又係

赴施南郡城要道堪以堵截賊匪不致竄入爲
害正在督率兵勇伐木取土趕緊拿卡詎於午
刻又有賊匪約計千餘前來撲搶臣與諸神保
慶溥率領兵丁先用大礮轟擊打死執旗賊目
二名賊勢少却卽帶兵從上壓下鎗箭所到又
擊殺一百餘名賊人知有準備四散奔竄生擒
賊匪六名訊據供稱賊人原在小坳茶園溪堰

塘等處屯聚因四川官兵攻打得緊目下都歸
到旗鼓寨一帶紮有木城四面挖有濠溝大小
男婦共數萬人多有各處焚搶時逼脅來者今
爲首是胡三師傅名胡正中還有田谷敦亦是
頭目要出打仗是胡三師傅臨時點派總想要
去攻龍山縣城訊明後卽於軍前正法一面連
夜拿卡務期堅固可資守禦此處距旗鼓寨約

十餘里一俟孫士毅移兵前來剿捕

臣

與諸神

保等卽帶兵奮勇來攻以冀迅速集事現今署
來鳳縣知縣王三錫將該縣迤北一帶避難民
人速行招撫復業奏入

上命軍機大臣傳諭孫士毅福寧曰來鳳賊匪於旗
鼓寨一帶屯聚前據孫士毅奏將茶園溪賊匪剿
淨定期夾攻今福寧已將來鳳縣治附近山梁佔

據拏卡賊匪無從逃竄正可知會孫士毅帶兵夾擊將旗鼓寨賊匪悉數殲除看來來鳳一帶已可尅期掃蕩孫士毅福寧卽當前赴長陽長樂將戕官賊首林之華及附近屯聚賊匪剿除淨盡

初十日

甲寅

慶成景安奏言本月初六日富成等

帶兵抵呂堰驛該處賊匪先已逃竄並派官兵進攻王家樓該處賊匪亦於是早聞風竄入雙

溝現在呂堰驛附近一路肅清富成等卽於該處紮營臣已將分路進剿呂堰驛日期先行知會恒瑞永保等想日內亦必前來會合面商夾擊事宜

同日宜縉奏言臣昨親赴鄖陽查知鄖西縣一帶王全禮寶爲逆首徐良乃其傳教之師先經竹山逆匪吳明山暗令徐良通信約期三月間

起事吳明山先搶竹山王全禮卽搶鄖陽及竹
山旣陷鄖陽府城中多有內應奸匪經地方官
及委員候補知府張璿等查出王旅昌等三十
餘名設計擒殺又經鄖縣知縣葉治將教首徐
良查拏正法其各鄉村賊匪經臣派固原兵弁
帶同鄉勇處處截殺所以二鄖之賊不能合爲
一處遂得以次撲滅內惟王全禮最爲驍悍又

據孤山廣山之險經臣添派兵將親身督率逆

犯全行授首但鄖縣鄖西一帶跬步皆山醜類

易於伏匿且恐房保逸匪竄入其中臣隨派委

員弁分路赴鄖陽鄖西盡力搜剿除臨時拒捕

斬殺者不計外每處生擒數十人至百餘人不

等并盤獲房縣保康逃來逆匪數十人訊明正

法現在漢江以北之賊俱已剿除淨盡地方寧

謚均奏入

上諭內閣曰宜綿查明逆首王全禮徐良等滋事緣
由實力搜捕全行授首復派委員弁於二鄖一帶
搜剿擒殺漢江以北悉就肅清實屬可嘉宜綿著
加恩賞戴雙眼花翎並加太子太保銜以示優獎
其在事出力之文武員弁並著宜綿查明咨部議

敘

十一日乙卯畢沅奏言臣與舒亮等圍困當陽賊

衆數日以來晝夜加緊攻摧已將東門缺口轟
寬一丈有餘初二日舒亮知會成德等分攻南
西北三門以牽賊勢偵探東門缺口賊人稍少
當卽督兵前往其時署總兵黃瑞等奮勇上城
鎗斃逆賊數十名正在乘勝殺入詎賊於城上
挖有濠溝下置刀矛竹籤官兵不能越過頃刻

間賊衆蜂擁而來矢石如雨以致隨後上城者
被賊攔住已經上城者究以衆寡不敵不能站
立且已有帶傷之人隨即撤回復施放大礮將
城上擁聚之賊連環轟摧殲斃四百餘人逆賊
銳氣已挫大半現仍加緊攻擊並令各營竭力
分攻以圖牽制賊勢

畢沅又奏言查安陸府京山縣屬勝境山訪有

教匪欲謀不軌該府施奕學當卽馳往親率署
縣李秉義護都司傅得悅等分投往捕先後拏
獲魯子貴等六十二名并於各家及山洞內查
出畏罪自盡屍身四十三具起獲刀鎗二十八
件究明係聽從謝郭萬爲首傳教共二百餘人
製有旗幟欲於三月十四日在謝家畝會集祭
旗滋擾京山便往荆襄會合同教魯子貴受有

偽職該府等因未獲逆匪尙多隨帶兵勇四圍
搜捕賊匪屯聚浦家埕地方恃衆抗拒兵勇奮
力爭先擊殺賊匪六十九人生擒馬名萬等二
十六名又據京山縣分防多寶灣縣丞王秉鈞
訪獲教匪張恒豐等十一名俱經訊明聽從入
教抗拒官兵分別斬梟正法其首逆謝郭萬僉
稱業已自盡傳集保甲認明屍身屬寔亦卽挫

骨揚灰又據隨州民羅振坤約保李宏光首報
州屬均川店地方有教匪聚集張行見家約於
十五日焚搶居民轉往襄陽曾齊同教該州張
曾敕招集鄉勇往捕張行見率同教匪百餘人
各執刀棍拒敵鄉勇奮力將張行見及夥黨七
十餘人登時擊斃并生擒蔡士佛等十三名訊
明俱係助逆要犯當亦分別凌遲斬梟該州續

獲張立等二十五名又盤獲張祥林黃石氏王
正亨三犯究出聽從周成禮習教約定五月初
五日燒搶白塘灣先佈散謠言欲乘居民驚惶
衝殺過城前往襄陽因令張祥林等男婦假作
難民混進城內探聽情形該署州張會敕當即
督領鄉勇分投往捕周成禮等二百餘人負隅
抗拒該署州親督鄉勇立時殲斃教匪一百二

十八人生擒周成禮等四十二名奪獲器械甚
多搜出邪經符咒等件訊明傳教謀逆屬實卽
將各逆分別凌遲斬梟再署鄆西縣秦錫疇盤
獲賊匪李茂究出賊衆潛匿大黃溝山內欲俟
大兵過境後復出滋擾該員隨與固原鎮把總
郭仲魁等馳往搜捕賊卽恃衆抗拒兵勇鎗箭
刀矛並舉立斃賊匪一百餘人追至觀音溝四

面圍殺殲戮殆盡李茂一犯亦卽正法在事出力弁兵鄉勇分別獎賞

同日孫士毅奏言據來鳳鄉民滕愛成到營

盤求見稟稱伊家將所存米穀供給鄉勇藉以

保護村莊曾殺竄匪十七人昨日風聞紅巖堡

賊匪聚衆數千前來報仇求官兵救援等情

臣

以滕愛成尙知大義況賊匪如果膽敢出巢必

應痛加剿殺卽密令將弁帶兵伏於滕姓住山
左右及前面山坳賊人果糾衆一二干涉溪越
嶺徑奔滕愛成家賊衆將到伏兵乘勢齊出賊
捨死格鬪我兵奮力痛剿殺斃甚多賊匪等又
知官兵截住去路四散奔逃我兵分路追殺賊
人落水溺斃無算該匪等心懷忿恨復于二十
二日厚集賊衆分作四路內一路向滕愛成家

三路向

臣

營盤

臣

卽派都司何天標帶兵速赴

滕愛成住處山嘴排列鎗礮堵截來路不令賊

匪得入其餘官兵分布

臣

營盤左右密諭弁兵

將弓箭火鎗持滿燃繩以待及賊衆陸續過河

登岸將近營盤官兵鎗矢齊發不留間隙賊積

屍徧地其餘一閃而退我兵趕殺過河斫死賊

匪不能記數是日守備阿克東阿李寅胡魁把

總龍必達外委會受羅應祥殺賊最多龍必達
已受刀石傷尚生擒賊匪一名會受羅應祥亦
各生擒賊匪一名以上六員均爲奮勇出衆可
否請

旨以應陞之缺候補以示鼓勵其派往滕愛成處一
路官兵經都司何天標分布山嶺扼要處嚴加
堵截賊匪不能前進俱卽退去現將擒獲三犯

寸磔梟示

孫士毅又奏言探聞咸豐賊匪約有萬人經該
縣康又民鼓勵鄉勇設伏堵剿殲戮甚多

臣處

又先經派兵二百名在彼協堵賊匪已望風逃
竄其派往堵禦之兵現仍令駐劄咸豐黔江交
界聽候就近調遣至土兵一項

臣前因諸神保

慶溥可至來鳳三面夾攻聲勢已大毋庸檄調

茲查諸神保慶溥距來鳳雖不甚遠但該處賊
匪尙頻頻窺伺伊等兵力亦屬無多自應仍令
土兵迅速前來將賊匪痛加洗蕩

同日成德惠齡富志那奏言數日以來臣等留

心察看灌灣腦山後之路如梳如櫛山勢蜿蜒
蟬聯起伏不但現在臣等紮營之所難以周防
卽遠至長陽長樂東湖松滋各縣亦均有路可

逢再四籌商莫如前後覓路奮力攻擊如能一處得手即可直搗中堅隨于五月初一日分道

進攻

臣

成德等先佔鳳凰觀山梁用礮轟擊

臣

惠齡等帶領官兵鄉勇另覓小路繞至賊巢後面天始微明一直搶過山梁將至賊巢牆外見沿牆一帶遍插鹿角竹簽并埋弩箭隨令兵勇奮力上前將鹿角竹簽拔起一面砍燬弩機爭

先進詎賊人聞聲羣起約有二三千人站立
牆頭放鎗抵禦官兵一面用黨牌遮護一面鎗
打箭射賊人毫無畏懼抵死不退官兵正在併
力向前忽見牆脚下地雷四起烟焰冲天幸官
兵刻刻提防受傷不過數人臣恐驟行退出必
致爲賊所乘隨一面施放大礮抵住賊人一面
將官兵徐徐撤出竟有愍不畏死之賊二百餘

人從牆下追奔前來

臣

遂令我兵分佔山梁開

鎗迎擊登時打倒數十人又經許文謨塔思哈

等帶領伏兵三路殺來縱兵掩擊所餘賊匪盡

皆殲除時天降大雨不便冒險再進因卽撤兵

回營

臣

成德等督率叅將鄭鵬翼等攻撲前面

賊卡賊人據險死守迨至午刻忽有賊人由溝

內潛出欲圖抄襲我兵後路經伏兵奮力追剿

殺斃數十人賊始退去官兵亦因雨撤回此次
兩路帶領鄉勇各員均爲出力臣等當卽分別

獎勵查明陣亡受傷者從優卹賞再榔坪逆匪
林之華於四月二十日在歸州風火山大巖等
處率領匪徒焚搶經貢生王光烈武生彭應壽
胡光第帶領鄉勇前往剿禦詎料賊匪千餘四
面蜂擁而至王光烈等督率鄉勇殺賊數十人

因眾寡不敵王光烈身受重傷陣亡彭應壽胡
光第經鄉勇張浩等奮力救出賊卽將風火山
大巖等處卡所佔據現又擾至九灣驛路以致
歸州巴東等各州縣處處戒嚴查由風火山至
長陽縣治僅一百餘里與灌灣腦賊巢亦有險
僻小路可通雖各處要隘均經召募鄉勇層層
設卡嚴防但賊匪衆多鄉勇恐難抵禦臣等現

有官兵不敷調遣文圖經臣兩次飛催尙無來
信惟有嚴飭各該州縣激勵鄉勇晝夜加緊防
範一面再行飛催文圖臣卽刻帶兵前來相機堵
剿均奏入

上命軍機大臣傳諭孫士毅畢沅惠齡曰畢沅本日
奏到仍未能將賊匪剿淨且所奏情形亦多未實
卽如摺內稱連日用礮轟擊城上擁聚之賊殲斃

四百餘人一節賊在城上官兵用礮仰擊被礮擊中之賊自必往後倒仆其人數多寡城外何由而知又稱賊於城上挖有溝濠一節當陽係一小縣城垣寬厚不過一二丈多有裹生外熟磚石築土者若城上挖濠則土勢鬆燹必致塌卸更可不須轟擊立見傾頽況城上挖有溝濠下置刀矛竹籤又安能站立多賊守城乎且官兵既不能上城何

稱賊匪蜂擁而來此必領兵將弁不能進取又圖
邀功張大其詞率行具稟而畢沅究係書生不諳
軍旅卽據以入奏而不顧其自相矛盾也惠齡奏
攻撲灌灣腦賊巢一摺亦仍未能掃除巢穴擒獲
首逆前據奏官軍進逼賊巢僅隔土牆一道此等
土牆一經大礮轟摧豈有不立時塌卸之理何以
又隔多日仍未能集事且據稱牆脚之下地雷四

起又值大雨撤兵回營等語前據惠齡奏賊匪所埋地雷皆被雨濕不能燃著今又云大雨撤兵地雷四起亦覺前後不侔畢沅惠齡均著傳旨申飭至榔坪賊匪擾至九灣驛及歸州巴東一帶文圖在喇叭洞攻圍已閱多日著傳諭文圖於該處賊匪剿淨後卽帶兵速赴榔坪一帶上緊剿辦勿任日久蔓延孫士毅奏咸豐縣知縣康父民於賊匪

擾至縣境時設法保護康又民前經降旨以應陞處陞用著再加賞銀一百兩交該督撫遇有同知缺出卽行陞補至畢沅所奏署總兵黃瑞等首先上城鎗斃多賊又京山縣知縣李秉義署隨州知州張曾敕等於賊匪商謀蠢動之先立時拿獲多名俱著交該督撫遇有應陞之缺陞用其盤獲賊匪究出賊黨拏獲多犯之署鄭西縣秦錫疇亦著

以應陞之缺陞用惠齡所奏歸州拔貢王光烈率
領鄉勇在風火山剿賊受傷身故情殊可憫著賞
給七品銜咨部議卹

十二日

丙辰

恒瑞永保鄂輝奏言五月初六日

臣

等自樊城帶兵起程

臣

恒瑞明亮由桐樹店一

路前進

臣

永保鄂輝由清河店張家營一路進

取鄧桃湖同至呂堰會合兩路搜捕沿途各處

賊匪見南北兩路官兵同時進攻俱向大路迤
東逃竄潛往各處聚集¹²等均於初六日晚間
先後馳抵呂堰兗州鎮總兵富成亦於是日在
呂堰紮營慶成景安亦皆先後帶兵前來探聞
各路賊匪俱各退歸雙溝等處屯聚現在熟商
定期進剿奏入

上命軍機大臣傳諭恒瑞永保景安慶成曰賊匪在

呂堰驛一帶滋擾及聞直隸山東山西陝西官兵到彼又皆竄往雙溝巢穴藏匿目下襄樊一帶軍威壯盛賊匪豈無聞知若恒瑞永保景安慶成等同駐一處設賊又乘間逃逸非南往南漳穀城當陽一帶卽東往河南之光州固始及湖北之武漢黃德一帶當陽城內賊匪現經畢沅等帶兵圍剿已將三月尙未竣事若再加以襄樊之賊官兵豈

不更費支持然當陽穀城南漳係前此已被賊滋
擾之區若武漢黃德光州固始地方本係安堵豈
可復使遭賊蹂躪著傳諭恒瑞永保等務須將雙
溝賊匪聚集之處帶兵四面嚴密圍剿以期悉數
殲擒不可同在呂堰駐劄致賊乘間他竄漢水廣
遠尤宜加意防範俾賊無從偷渡斷不可令其東
逸至漢口光固一帶此爲最要